

HILDUR BETTÝ KRISTJÁNSDÓTTIR OG VALGEIR BLÖNDAL MAGNÚSSON

## SAMSTARF SÍMEY OG KEILIS UM HÁSKÓLABRÚ Á AKUREYRI



Hildur Bettý Kristjánsdóttir



Valgeir Blöndal Magnússon

Vorið 2010 gerðu SÍMEY og Keilir, miðstöð vísinda, fræða og atvinnulífs, með sér samning um rekstur „Háskólabrúar“ á Akureyri. Samstarfið er tilkomið vegna þess að stór hópur nemenda hafði lokið Menntastöðum hjá SÍMEY og vildi halda áfram í námi á vettvangi fullorðinsfræðslunnar. Eitt af markmiðum SÍMEY er að koma til móts við þarfir nemenda og leita leiða til samstarfs við aðra fræðsluaðila og var því ákveðið að leita til Keilis þar sem frumgreinanám hafði ekki verið í boði á Akureyri fram að þessu.

Þegar námið var auglýst fyrst kom í ljós að á svæðinu var mikil þörf fyrir frumgreinanám sem kennt væri á dag-tíma og lánshæft hjá Lánasjóði íslenskra námsmanna. Alls skráðu 28 einstaklingar sig í námið og fyrsta árið var boðið upp á tvær deildir, félagsvísinda- og lagadeild og verk- og raunvísindadeild. Ráðnir voru kennarar frá Verkmenntaskólanum á Akureyri, Menntaskólanum á Akureyri og SÍMEY til að kenna. Samningurinn um Háskólabrú var þess eðlis að verkefnastjórar hjá SÍMEY voru skipaðir yfir námsleiðinni til að sjá um utanumhald, ráðningu kennara, samskipti við nemendur og forstöðumann Háskólabrúar Keilis.

Inntökuskilyrðin í Háskólabrú eru að nemendur hafi lokið 117 feiningum á framhaldsskólastigi en einnig gerir Háskóli Íslands þær kröfur að umsækjendur hafi náð 25 ára aldri. Nemendur eiga möguleika á að fá starfsreynslu sína metna til eininga að hluta upp í þær lágmarkseiningar sem krafist er. Kennsluáðferðir eru fjölbreyttar og hefur verið lögð

áhersla á vendikennslu (flipped classroom). Með því er átt við að hefðbundinni kennslu er snúið við þar sem fyrirlestrar og kynningar kennara eru vistuð á netinu. Nemendur geta horft og hlustað á kynningarnar eins oft og þeim sýnist og hvar sem þeim sýnist. Þá geta nemendur sent spurningar um efnið til kennara (eða annarra nemenda í hópnum) og fengið svör á netinu sem öllum eru opin. Þá eru nemendur hvattir til að nota netið til að finna heppilegt kennsluefni. Kennslustundir í skólanum verða fyrir vikið öðruvísi. Þar vinna nemendur verkefni, oftast saman í hóp, og kennarar aðstoða eftir þörfum við úrlausnir. Þar sem þetta form hefur verið reynt virðist lærdómurinn verða lifandi ferli sem virkjar nemendur á skemmtilegan hátt.

Kosturinn við samstarf Háskólabrúar Keilis og SÍMEY er ótvíræður. Kennarar eftir aðferðafræði fullorðinsfræðslunnar og sökum smæðar miðstöðvarinnar er öll þjónusta við nemendur auðsött, s.s. náms- og starfsráðgjöf, aukakennsla o.fl. Nemendahóparnir mynda fljótt uppbyggjandi námssamfélag



Hópefli hjá nemendum Háskólabrúar.



Nemdur Háskólabrúar við útskrift 2012.

Þar sem jafningjastuðningur er mikill og allir upplifa sig sem hluta af heild.

Við leitum til fjögurra fyrirverandi nemenda Háskólabrúar og báðum þá að lýsa upplifun sinni af náminu í Háskólabrú. Ástæðan fyrir því að þeir völdu að stunda nám í Háskólabrú var að nám á dagtíma hentaði vel en einnig að geta klárað námið á einu ári. Samsetning nemendahópsins, eldri nemendur sem voru að styrkja stöðu sína til áframhaldandi náms, var líka hluti af ástæðunni. Þeim fannst námsumhverfið vera persónulegt og það skipti nemendurna miklu máli sem og samheldni hópsins þegar kom að því að takast á við krefjandi verkefni.

„Veturinn í náminu var frábær,“ eins og einn nemandinn orðar það. Hin tala um að þau hafi eflst eftir því sem leið á veturinn og metnaðurinn til að standa sig vel hafi aukist jafnt og þétt. Nemendur nefna að þeir hafi lært vinnubrögð og aga sem nýtist þeim í háskólanámi en þeir stunda nú nám við Háskólann á Akureyri, Háskóla Íslands, Háskólann í Reykjavík og einn nemandi rekur eigið fyrirtæki í dag.

Allir mæla þeir með námi í Háskólabrú. Þeim fannst námið og umgjörðin fyrsta flokks, kennsla og ráðgjöf til fyrirmyndar og síðast en ekki síst reyndist námið góður undirbúningur fyrir háskólanám.

Frá því að Háskólabrú hóf göngu sína á Akureyri haustið 2010 hafa 127 nemendur skráð sig í námið. Flestir útskrifaðir nemendur hafa innritast í háskólanám og er því óhætt að segja að Háskólabrúin beri nafn með rentu.

Skráðir nemendur í Háskólabrú Keilis á árunum 2010–2014.

Árið	2010	2011	2012	2013	2014
Fjöldi nemenda	28	27	23	27	22

Skipting nemenda eftir kyni.

Kyn	Fjöldi
Konur	86
Karlar	41

## UM HÖFUNDANA

**Hildur Betty Kristjánsdóttir** starfar sem verkefnastjóri og náms- og starfsráðgjafi hjá Símenntunarmiðstöð Eyjafjarðar á Akureyri. Hún hefur B.Ed.-próf í grunnskólafræðum, M.Ed.-próf í stjórnun menntastofnana. Hún leggur stund á doktorsnám í námi fullorðinna með áherslu á raunfærnimat við Háskóla Íslands. Hún hefur starfað innan leik- og grunnskóla við kennslu en síðustu ár við verkefnastjórn, kennslu og ráðgjöf innan fullorðinsfræðslunnar.

**Valgeir Magnússon** starfar sem verkefnastjóri og náms- og starfsráðgjafi hjá Símenntunarmiðstöð Eyjafjarðar á Akureyri. Hann hefur B.Ed.-próf í grunnskólafræðum og er meistaranemi í náms- og starfsráðgjöf með áherslu á raunfærnimat við Háskóla Íslands. Hann starfaði hjá Vinnuálagstofnun en síðustu ár við verkefnastjórn, kennslu og ráðgjöf innan fullorðinsfræðslunnar.